



Cuir, ils 31 d'october 2014

Disposiziun nr. 387

DISPOSIZIUN DA L'UFFIZI

Relasch da las directivas per il servetsch psicologic da scola

Tenor l'art. 73 al. 4 da l'ordinaziun tar la lescha da scola dals 25 da settember 2012 (ordinaziun da scola; DG 421.010) relascha l'uffizi directivas davart l'organisaziun, las obligaziuns e las incumbensas dal servetsch psicologic da scola e divida il territori chantunal en regiuns da cussegliaziun.


Sa basond sin l'art. 73 al. 4 da l'ordinaziun da scola

dispona l'uffizi per la scola populara ed il sport:

1. Las directivas per il servetsch psicologic da scola vegnan relaschadas.
2. Communicaziun a: departament d'educaziun, cultura e protecziun da l'ambient; uffizi per la scola populara ed il sport.

UFFIZI PER LA SCOLA
POPULARA ED IL SPORT

Dany Bazzell, manader da l'uffizi



Directivas per il servetsch psicologic da scola

sa basond sin l'art. 91 da la lescha davart las scolas popularas dal chantun Grischun dals 21 da mars 2012 (lescha da scola; DG 421.000) e sin l'art. 73 da l'ordinaziun tar la lescha da scola dals 25 da settember 2012 (ordinaziun da scola; DG 421.010)

relaschadas da l'uffizi per la scola populara ed il sport ils 31 d'october 2014

Art. 1

¹ Questas directivas han l'intent da reglar l'organisaziun, las obligaziuns e las incumbensas dal servetsch psicologic da scola.

Intent,
champ d'applicaziun

² Tras questas directivas vegn il territori chantunal dividì en regiuns da cussegliazion.

Art. 2

¹ Il servetsch psicologic da scola è ina partiziun da l'uffizi per la scola populara ed il sport.

Organisaziun

² La partiziun sa cumpona da la direcziun da la partiziun sco er da las cussegliastras regionalas e dals cussegliastrs regional da scola e d'educaziun.

Art. 3

Il servetsch psicologic da scola stat a disposiziun a tut ils uffants e giuvenils che frequentan la scola populara sco er a lur persunas da referiment. Per laschar sclerir e proponer mesiras da la pedagogia speziala po el vegnir consultà er ordaifer la scola populara. Quai po esser il cas cunzunt en dumondas da la scolaziun speziala en la vegliadetgna prescolara u durant il temp da scola postobligatoric fin a la cumplenida dal 20avel onn da vita.

Obligaziuns

Art. 4

Al servetsch psicologic da scola èn delegadas las suandantas incumbensas:

Incumbensas

- a) cussegliazion dals geniturs e da las persunas d'instrucziun en il cas singul en dumondas da scola e d'educaziun;
- b) scleriments, cussegliazions e propostas en cas da problems d'emprender, da prestaziun, da cumportament e da svilup sco er en cas da dumondas da la carriera da furmaziun d'uffants e da giuvenils;
- c) scleriments, cussegliazions e propostas en cas da scolaziun speziala;
- d) cussegliazion da persunas d'instrucziun en cas da problems considerabels d'educaziun e da manar la classa;
- e) prevenziun da problems da scola, da svilup e d'educaziun en il rom da la furmaziun da geniturs e da la lavur da publicitad;
- f) agid psicologic pedagogic per uffants e giuvenils en cas da problems d'emprender, da prestaziun, da cumportament e da svilup;
- g) cussegliazion da las instituziuns responsablas per la scola;
- h) sustegn psicologic en cas d'urgenza;

- i) collavuraziun entaifer il departament ed entaifer l'uffizi en cas da dumondas psicologicas pedagogicas da scola e d'educaziun;
- j) cooperaziun en il sector da la scolaziun e dal perfecziunament da personas d'instrucziun sco er da psicologas e da psicologs;
- k) cooperaziun tar experiments e tar projects da scola.

Art. 5

Il territori chantunal vegn dividì en tschintg regiuns da cussegliaziun:

Divisiun

1. Il district Plessur-Grischun central cun ils posts regiunals a Cuir ed a Tusaun cumpiglia las regiuns Plessur (senza Haldenstein), Alvra e Viamala.
2. Il district Val dal Rain-Partenz-Tavau cun ils posts regiunals a Domat, a Landquart ed a Tavau cumpiglia las regiuns Plaun, Landquart e Partenz/Tavau sco er la vischnanca da Haldenstein.
3. Il district Surselva cun il post regional a Glion e cun il post extern a Mustér cumpiglia la regiun Surselva.
4. Il district Engiadina-Val Müstair-Samignun cun ils posts regiunals a Scuol ed a San Murezzan cumpiglia las regiuns Engiadina bassa/Val Müstair e Malögia (senza Bregaglia).
5. Il district Grischun talian cun ils posts regiunals a Roveredo ed a Puschlav cumpiglia las regiuns Moesa e Bernina sco er la vischnanca da Bregaglia.

Art. 6

Il persunal dal servetsch psicologic da scola è suttamess a l'obligaziun da discreziun sco er al secret professional tenor la legislaziun chantunala e federala.

Obligaziun da discreziun

Art. 7

Il servetsch psicologic da scola collavura stretgamain cun ils geniturs, cun las personas d'instrucziun, cun ils inspecturats da scola, cun las instituziuns responsablas per la scola, cun las medias ed ils medis, cun la psichiatria d'uffants e da giuvenils, cun ils servetschs socials e cun la lavur sociala da scola, cun il servetsch da pedagogia curativa, cun l'autorità per la protecziun d'uffants e da creschids sco er cun instituziuns sumegliantas.

Collavuraziun

Art. 8

¹ Annunzias ston vegnir drizzadas als posts regiunals per la cussegliaziun da scola e d'educaziun.

Annunzia

² Il dretg d'annunziar uffants e giuvenils han las personas responsablas per l'educaziun, las personas d'instrucziun, ils inspecturats da scola, las instituziuns responsablas per la scola, l'autorità per la protecziun d'uffants e da creschids, ils servetschs socials, la lavur sociala da scola, las medias ed ils medis, la psichiatria d'uffants e da giuvenils ed il servetsch da pedagogia curativa. Per l'annunzia dovri il consentiment d'ina represchentanta legala u d'in represchentant legal da l'uffant. Uffants e giuvenils ch'èn abels da giuditgar pon s'annunziar sezs.

Art. 9

Il scleriment e la cussegliaziun psicologica da scola èn gratuits.

Custs

Art. 10

Questas directivas entran en vigur il 1. da november 2014.

Entrada en vigur